

助

字

辨

略

助字辨略卷二目錄

下平聲

先

前

然

焉

旃

偏

全

懸

緣

旋

專

額割通

連

聊

皐

饒

交

何

多

佗

它同俗作他

俄

蛾通

那

麼

和

邪

些

娑

加

嗟

遐

瑕霞通

良

方

當

將

常

長

嘗

相

強

剛

羗

更

行

誠

贏

平

情

生

爭

成

井

寧

馨附

烝

應

仍

登

曾

能

恆

勝

尤

猶

猷同

由

攸

疇

休

侯

尋

臨

今

任

深

堪

兼

咸

僉

凡

助字辨略卷二

確山劉淇武仲

先 漢書食貨志先是十餘歲河決灌梁楚地固已
數困先是追原之辭也史記平準書作初先是往
十餘歲河決觀梁楚之地固已數困初先是者重
言也往亦先是之辭此以四字爲重言者也

前 漢書高帝紀前陳王項梁皆敗不如更遣長者
前猶云先是也

然 漢書高帝紀呂后問曰陛下百歲後蕭相國旣
死誰令代之上曰曹參可問其次曰王陵可然少

贛陳平可以助之陳平知有餘然難獨任周勃重
厚少文然安劉氏者必勃也諸然字竝轉語也又
禮記祭義君子之所謂孝也者國人稱願然曰幸
哉有子如此所謂孝也已鄭注云然猶而也漢書
張良傳漢王乃遣隨何說九江王布而使人連彭
越及魏王豹反使韓信特將北擊之因舉燕代齊
趙然卒破楚者此三人力也此然字亦而辭也又
孟子無若宋人然又云使民盼盼然此然字猶如
也又楚辭九章固朕形之不服兮然容與而狐疑
宋玉九辨然中路而迷惑兮自厭按而學誦又云

忠昭昭而願見兮然露晷而莫達又云被荷裯之
晏晏兮然潢洋而不可帶此然字發語辭也今陳
蔡開發語猶云然完也又書盤庚用懷爾然蔡注
云用懷念爾故也又詩國風胡然我念之大雅無
然畔援無然歆羨荀子正名篇五官以簿之而不
知心徵之而無說則人莫不然謂之不知解蔽篇
強鉗而利口厚顏而忍詬無正而恣睢妄辨而幾
利不好辭讓不敬禮節而好相推擠此亂世姦人
之說也則天下之治說者方多然矣史記游俠傳
此皆學士所謂有道仁人也猶然遭此舊漢書司

馬相如傳若然辭之是泰山靡記而梁父罔樂也
諸然字竝語助辭不爲義者也又禮記檀弓歲旱
穆公召縣子而問然鄭注云然之言焉也又論語
雍之言然正義云然猶是也史記孔子世家孔子
欣然笑曰形狀未也而似喪家之狗然哉然哉重
言然哉者深以爲是也又難經一難曰十二經皆
有動脉獨取寸口以決五藏六府死生吉凶之法
何謂也然寸口者脉之大會手太陰之脉動也二
難曰脉有尺寸何謂也然尺寸者脉之大要會也
滑伯仁注云然答辭愚按此然字應問者之聲旣

先答之後乃剖其是非不爲義者也。如孟子時子
因陳子以告孟子。陳子以時子之言告孟子。孟子
曰：然亦是先答而後語其不可也。又孟子然後敢
入。又云：予然後浩然有歸志。然後乃也。繼事之辭
也。又漢書萬石君傳：子孫有過失，不謂讓爲便坐。
對案不食，然後諸子相責。因長老肉袒固謝罪，改
之乃許。此然後亦是乃辭，然與上意有別。上云：因
其如此，方敢入。方有歸志，其辭緩。此云：見其如此，
遂相責謝罪。其辭急。乃字原有兩訓。故然後亦兼
二義也。又後漢書朱穆傳：然知薄者之不足厚者。

之有餘也此然字猶云然後省文也如韓退之論
淮西事宜狀事至不惑然可圖功又云兵之勝負
實在賞罰賞厚可令廉士動心罰重可令凶人喪
魄然可集事又云待其稍能緝綏然擬許其承繼
論變鹽法事宜狀州縣和雇車牛百姓必無情願
事須差配然付腳錢諸然字竝是然後疑當時方
言如此故文移皆省去後字也又史記律書因其
欲然能不擾亂此然字猶云如是也又詩關雎序
然則關雎麟趾之化王者之風故繫之周公正義
曰然者然上語則者則下事因前起後之勢也愚

按如孟子然則小固不可以敵大左傳哀公十七年武伯問於高柴曰諸侯盟誰執牛耳季羔曰鄒衍之役吳公子姑曹發陽之役衛石魋武伯曰然則藪也凡言然則皆承上語以發下意然者如是也既如是則當云何故云然則也又周語上得民心以殖義方是以作無不濟求無不獲然則能樂此此然則猶云然後又禮記學記夫然故安其學而親其師樂其友而信其道夫然猶云夫如是承上之辭也又論語不然獲罪於天無所禱也不然者否也猶云不如此此辭之決也又左傳僖公二

十三年凡諸侯同盟死則赴以名禮也赴以名則亦書之不然則否辟不敏也不然則否者言若不赴以名則亦不書名此不然意在兩可與決辭別也又左傳成公十八年若楚人與吾同惡以德於我吾固事之也不敢貳矣大國無厭鄙我猶憾不然而收吾憎使贊其政以間吾讐亦吾患也史記吳世家歌唐曰思深哉其有陶唐氏之遺風乎不然何憂之遠也此不然反設之辭辭之頓挫者也與上義又別又荀子哀公篇哀公曰然則夫章甫絢屨紳而搢笏者此賢乎孔子對曰不必然不必

然猶云不盡然也又論語子曰其然豈其然乎其
然未信之辭也又左傳襄公二十三年他日又訪
焉對曰其然將具敝車而行杜注云其然猶必然
愚按此與上其然義別又史記魏世家王曰以孟
嘗芒卯之賢率強韓魏以攻秦猶無奈寡人何也
今以無能之如耳魏齊而率弱韓魏以伐秦其無
奈寡人何亦明矣左右皆曰甚然甚然者深贊之
猶云大是也又韓退之論淮西事宜狀自然相率
棄逆歸順黃家賊事宜狀處理得宜自然永無侵
叛之事自然者無所勉強之辭也又世說謝太傅

語王右軍曰中年傷於哀樂與親友別輒作數日惡主曰年在桑榆自然至此此自然應合之辭也又史記范雎傳意者臣愚而不概于王心邪臣其言臣者賤而不可用乎自非然者臣願得少賜游觀之間望見顏色自非然者猶云如其不然反設之辭也又漢書賈誼傳上因感鬼神事而問鬼神之本誼具道所以然之故所以然者推本之辭也又史記鄭世家齊襄公會諸侯於首止鄭子驪往會高渠彌相從祭仲稱疾不行所以然者子驪自齊襄公爲公子之時嘗會鬪相仇及會諸侯祭仲

請子亶無行子亶曰齊強而厲公居櫟卽不從是率諸侯伐我內厲公我不如徃徃何遽必辱且又何至是卒行于是祭仲恐齊并殺之故稱疾此欲發明前事故云所以然者以原之亦是推本之辭而與賈傳語氣微別又左傳僖公十四年慶鄭曰棄信背隣患孰恤之無信患作失援必斃是則然矣是則然矣猶云是必然矣又韓退之論淮西事宜狀至於分兵出界公然爲惡亦必不敢杜子美詩公然抱茅入竹去公然者明明如此無所顧忌也

焉 廣韵云何也。柳子厚云決辭也。顏氏家訓云焉
語辭音於愆反。自葛洪要用字苑分焉字音訓若
訓何訓安當音於愆反於焉逍遙於焉嘉客焉用
佞焉得仁之類是也。若送句及助語當音矣。愆反
故稱龍焉故稱血焉有民人焉有社稷焉託始焉
爾晉鄭焉依之類是也。江南至今行此分別昭然
易曉而河北混同一音雖依古讀不可行於今也
愚按于焉逍遙鄭箋訓作于何逍遙也。漢書郊祀
志今穀噉未報鼎焉爲出哉焉爲出者猶云何爲
出曷爲出也。晉鄭焉依之焉語助辭猶云晉鄭是

依也。如詩國風心焉忉忉之類。又孟子人莫大焉
亡親戚君臣上下。此焉字於辭。猶云人莫大於亡
親戚君臣上下也。又左傳襄公二十一年。若大盜
禮焉。以君之姑姊與其大邑。此焉字之辭也。季武
子以公姑姊妻庶其。故云禮之以君之姑姊也。又
禮記三年問。然則何以三年也。曰。加隆焉爾也。焉
使倍之。故再期也。陳氏集說云。焉語辭。猶所以也。
淮南子。天子焉始乘舟。注云。焉猶於也。愚按。此二
焉字。竝發語辭。如楚辭九章。順風波而流從兮。焉
洋洋而爲客。遠遊篇。質菲薄而無回兮。焉托乘而

上游皆發語辭也。又與安然通。禮記三年問故先
王焉爲之立中制節。荀子禮論篇作安爲之立中
制節。如楚辭九辨然中路而迷惑。然容與而狐疑。
然字卽是焉字。焉然安音相近。皆楚語也。淮南楚
地荀屈楚人故也。又漢書兒寬傳寬表奏開六輔
渠。韋昭云六輔謂京兆馮翊扶風河東河南河內
也。師古云溝洫志曰兒寬爲左內史奏請穿六輔
渠以益漑鄭國旁高仰之田。此則於鄭國渠上流
南岍更開六道小渠以輔助灌溉耳。今雍州雲陽
三原兩縣界此渠尙存。鄉人名曰六渠。亦號輔渠。

故河渠書云關內則輔渠靈軹是也焉說三河之地哉此焉字寧也豈也

旃 廣韵云之也詩國風舍旃舍旃鄭箋云旃之言焉也左傳桓公十年初虞叔有玉虞公求旃杜注云旃之也漢書王貢兩龔傳舉茲以旃不亦寶乎師古云旃亦之也言舉此人而用之不亦國之寶乎顧氏曰知錄云之焉爲旃

偏 畸重之辭也世說謝公因子弟集聚問毛詩何句最佳過稱曰昔我往矣楊柳依依今我來思雨雪霏霏公曰許謨定命遠猶辰告謂此句偏有雅

人深致杜子美詩杜酒偏勞勸李義山詩清露偏知桂葉濃

全 都也皆也史記倉公傳問臣意胗病決死生能全無失乎魏志和洽傳本初乘資雖能強大然雄豪方起全未可必也李義山詩楊僕移關三百里可能全是爲荆山

懸 顏氏家訓吾初入鄴與博陵崔文彥交游嘗說王粲集中難鄭平尙書事崔轉爲諸儒道之始將發口懸見排疊懸猶預也凡預計遙揣皆曰懸者懸是繫物之稱物繫則有不定之勢預計遙揣有

未定之意故云懸也

緣 因也公羊傳閔公元年緣季子之心而爲之譁
世說雖率物亦緣其性真李義山詩枉緣書札損
文鱗又後漢書袁安傳今朔漠既定宜令南單于
反其北庭竝領降衆無緣復更立阿佟以增國費
蜀志先主傳汪孫盛云劉備雄才處必已之地告
急於吳而獲奔助無緣復顧望江渚而懷後計無
緣猶云不應

旋 史記倉公傳病旋已索隱云言尋卽已止也愚
按不多時曰旋旋轉也言一轉頃卽如何也又與

還通漢書董仲舒傳此皆可使還至而立有效者也師古云還讀曰旋速也

專 廣韵云單也獨也淮南子體道者不專在於我亦有繫于世矣又東方朔十洲記方丈面各五千里上專是羣龍所聚此專字猶云全也與獨字義別又史記曹相國世家參見人之有細過專掩匿覆蓋之此專字言一意如此也又與顓剽通史記陳涉世家客愚無知顓妄言輕威漢書張叔傳歐爲吏未嘗言按人專以誠長者處官此二條與專掩匿覆蓋之專義同

連頻也不絕之義漢書朱雲傳連挂五鹿君又神仙傳河上公授漢文帝素書二卷曰余注此經以來一千餘年凡傳三人連子四矣此連字猶云竝也

聊 廣韵云語助詩國風椒聊且又國風聊與之謀鄭箋云聊且略之辭又吳志陸凱傳注當愛育百姓何聊趣于不急何聊猶云何且然有苟且之意與上微別

臯 禮記禮運及其死也升座而號告曰臯某復注云臯者引聲之言

饒 廣韵云餘也杜子美詩浣花谿裏花饒笑言多
餘也又杜牧之詩饒是少年須白頭楊龜山云外
邊用計用數假饒立得功業只是人欲之私此饒
字縱也任也饒得爲縱任者饒讓也讓而不與之
校故得轉爲縱任也假饒猶云縱令設辭也

交 小爾雅云俱也廣韵云共也書禹貢庶土交正
孔傳云交俱也孔疏云交錯更互俱之義故交爲
俱也又詩小雅不令兄弟交相爲瘡孔疏訓作交
更相詬病愚按交更亦錯互之義也又陸宣公奏
議交下不存濟蔣之翘韓退之集注云交唐人語

猶曰卽今云爾

何 奚也曷也安也焉也烏也胡也豈也寧也孰也
誰也左傳僖公三十二年公使謂之曰爾何知此
焉安等辭也論語非諸侯而何此誰孰之辭也凡
云非而何者明其正是此事蓋反言之又書皐陶
謨禹曰何蔡注云禹曰何者問其九德之目也又
論語何哉爾所謂達者何哉詰難之辭又公羊傳
隱公元年元年者何何休云諸据疑問所不知故
曰者何儀禮喪服傳斬者何不緝也疏云斬者何
問辭以執所不知故云者何愚按者何設問之辭

也。又漢書高帝紀：吾所以有天下者，何？項氏之所以失天下者，何？此何字與上義相近。上言何謂此言何故也。又晉書王衍傳：總角嘗造山濤，濤嗟歎良久，旣去，目而送之，曰：何物老嫗生寧馨兒！世說：盧志於衆坐，問陸士衡：陸遜陸抗是君何物？何物猶俗云甚底。二條義亦微別。山濤言何物老嫗生如此兒，盧志言陸遜陸抗是君何人也。又論語：夫子何哂由也？漢書賈誼傳：人性不甚相遠也。何三代之君有道之長而秦無道之暴也？此何字猶云何以？公羊傳：隱元年，何以不言即位？何休云：据文。

公言卽位也。愚按何以猶云緣何。又孟子何以利吾國。此何以猶云如何。計量之辭也。又論語然而識之學而不厭。誨人不倦。何有於我哉。何有猶云豈有。易繫辭君子藏器于身。待時而動。何不利之有此言。豈有不利也。世說注何有亂頭養望。自謂宏達耶。此亦豈有之義。而與上微別。上何有是正說言一無所有。有字重。此何有是反說言焉。有如此而謂之宏達。有字輕。又論語能以禮讓爲國乎。何有。朱注云何有言不難也。又左傳僖公十五年獲晉侯以厚歸也。旣而喪歸焉。川之大夫其何有。

焉杜注云何有猶何得愚按此言無所利也又左
傳僖公二十二年且今之勅者皆吾敵也雖及胡
考獲則取之何有于二毛僖公二十四年除君之
惡唯力是視蒲人狄人余何有焉此何有猶言何
愛又吳志張昭傳將軍何有當爾呂岱傳周易有
之禮言恭德言盛將軍何有盡此美邪此何有猶
言如何又孟子父母之不我愛於我何哉此言父
母之不我愛我必有罪但不知何罪耳所以足孝
子之心不若是忍之意徒云何者省文也又漢書
袁盎傳絲能日飲亡何師古云亡何言更無餘事

又漢書金日磾傳何羅亡何從外入師古云亡何
猶言無故魏志賈逵傳注過其妻兄柳孚宿其明
無何著手袴去華佗傳又有一郡守病佗以爲其
人盛怒則差乃多受其貨而不加治無何棄去晉
書罵之顏氏家訓北人無何便爾說話及相訪問
諸無何竝是無故之辭無故猶云無端俗云沒來
由是也又荀子天論篇星墜木鳴國人皆恐曰是
何也曰無何也是天地之變陰陽之化物之罕至
者也漢書淮南王傳王視漢中尉顏色和問斥雷
被事耳自度無何此無何言無他患故也又史記

齊悼惠王世家居無何漢將欒布平陽侯等兵至
齊匈奴傳居無幾何陳豨反無何無幾何竝未多
時之辭也又詩國風何彼穠矣唐棣之華鄭箋云
何乎彼戎戎者乃移之華也又史記高帝紀是何
治宮室過度也陸賈傳何念之深也漢書東方朔
傳受賜不待詔何無禮也拔劍割肉壹何壯也割
之不多又何廉也歸遺細君又何仁也諸何字猶
云何其歎異之辭也如世說林公道王長史何其
軒軒韶舉是也又宋玉神女賦夫何神女之姣麗
兮司馬相如長門賦夫何一佳人兮夫何發語辭

也此何字亦有歎異之義又書堯典帝曰俞予聞
如何史記留侯世家漢王方食曰子房前客有爲
我計撓楚權者具以酈生語告於子房曰何如如
何何如竝問可否之辭也又史記張耳陳餘傳始
吾與公言何如今見小辱而欲死一吏乎此何如
猶言何物又論語臧文仲居蔡山節藻梲何如其
知也此言文仲以知稱若居蔡一節如之何其可
謂之知也又史記扁鵲傳扁鵲曰其死何如時曰
鷄鳴至今何如時猶言幾何時也又史記項羽紀
於是張良至軍門見樊噲樊噲曰今日之事何如

倉公傳嘗有所驗何縣里人也何病醫藥已其病之狀皆何如具悉而對此何如猶言何似未悉其事之形狀而問之也又奈何如何也詳四卷奈字條下又左傳莊公十一年天作霪雨害於棗盛若之何不弔襄公二十六年夫小人之性斃于勇鬻于禍以足其性而求名焉者非國家之利也若何從之孟子昔者病今日愈如之何不弔張平子東京賦如之何其以溫故知新研覈是非近於此惑李善云如奈也愚按如若竝奈辭此云奈何非是無可奈何猶俗云爲甚如此爲甚不如此也又左

傳僖公十五年晉侯謂慶鄭曰寇深矣若之何對
曰君實深之可若何此云若之何者無可奈何相
與計較之辭慶鄭則直答以無可奈何而已故曰
可若何也又左傳成公二年苟君與吾父免矣可
若何杜注云言餘人不可復如何也愚按此言君
父既免雖師敗不爲大患晉人其無奈我何不謂
餘人也又論語季康子問使民敬忠以勸如之何
此言何道而致之請教之辭也如閔子騫曰仍舊
貫如之何此則閔子不敢直言仍舊之是故作商
量之辭曰如之何也與季康子之云有別又詩國

風天實爲之謂之何哉謂之何者奈之何也言無可如何也漢書禮樂志是邪謂何晉灼云謂何當如之何也愚按亦無奈何之意左傳成公二年以師伐人遇其師而還將謂君何杜注云言無以答君史記禮書漢亦一家之事典法不傳謂子孫何文帝紀謂天下何師古云猶言無以稱天下之望愚按凡云謂誰何者言無辭以塞之也竝是奈何如何之義而意略不同謂何得爲奈何者謂云也云何如何也如何奈何也轉相訓又史記禮書孝文卽位有司議欲定儀禮孝文好道家之學以爲

繁禮飾貌無益於治躬化謂何耳此言繁禮非實
但在躬行教化如何耳與奈何義別又詩國風云
何吁矣吳志孫討逆傳策因往到融營下令左右
大呼曰孫郎竟云何世說東亭問法圖道人曰弟
子都未解阿彌那得已解所得云何云何如何也
又漢書王莽傳國家所以服此美膺此名饗此福
受此榮者豈非太皇太后日昃之思陛下夕惕之
念哉何謂亂則統其理危則致其安禍則引其福
絕則繼其統幼則代其任師古云何謂先爲設問
後陳其事也愚按如史記田齊世家中國白頭游

敖之士皆積智欲離齊秦之交伏式結軼西馳者
未有一人言善齊者也伏式結軼東馳者未有一
人言善秦者也何則皆不欲齊秦之合也孔子世
家丘聞之也刳胎殺夭則麒麟不至郊竭澤涸漁
則蛟龍不合陰陽覆巢毀卵則鳳凰不翔何則君
子諱傷其類也史記項羽紀陳餘亦遺章邯書曰
白起爲秦將南征鄢郢北阬馬服攻城略地不可
勝計而竟賜死蒙恬爲秦將北逐戎人開榆中地
數千里竟斬陽周何者功多秦不能盡封因以法
誅之儒林傳黃生曰冠雖敝必加於首履雖新必

關于足何者上下之分也何則何者竝先設問後
陳其事也又詩小雅彼人之心于何其臻于何言
在何所以爲幽王之心不知其所居也又漢書禮
樂志訾黃其何不徠下何不猶言如何不省文也
又漢書賈誼傳陛下何不試以臣爲屬國之官以
主匈奴此何不是商量之辭與上義別又左傳襄
公三十一年孝伯曰人生幾何幾何言無多時也
此與漢書匈奴傳居無幾何義別史記倉公傳詔
問故太倉長臣意方伎所長及所能治病者有其
書無有皆安受學受學幾何歲此幾何猶云幾許

問多少之辭也左傳襄公二十九年裨竈曰是盟也其與幾何其與句絕言此與不盟相去無幾許也又漢書傳不疑傳廷尉驗治何人竟得姦詐師古云凡不知姓名所從來皆曰何人愚按如後漢書來歙傳臣夜人定後爲何人所賊傷中臣要害魏志許允傳有何人天未明乘馬以詔版付允門吏曰有詔皆是不知姓名之辭也又晉武帝答司馬孚等詔本諸生家傳禮來久何至一旦便易此情於所天宋文帝與江夏王義恭書性之所滯其欲必行意所不在從物回改此最弊事宜應慨然

立志念自裁抑何至丈夫方欲贊世成名而無斷者哉何至猶言豈有

多 史記秦紀佐舜訓馴鳥獸鳥獸多馴服凡云多如何者強半之辭也又後漢書自叙觀古今文人多不全了此處此多字與頗字相近言不了此處者爲復不少也又魏志陳思王傳注以孔璋之才不閑辭賦而多自謂與司馬長卿同風鍾嶸詩品袁嘏詩平平耳多自謂能此多字猶云盛也廣韻云多衆也衆盛義同猶上林賦所謂盛推雲夢者也又韓退之答李渝州書乖隔年多年多猶云年

餘又通作祇論語多見其不知量也正義云多猶適也所以多得爲適者古人多祇同音左傳襄公二十九年多見疏也服虔本作祇見疏解云祇適也晉宋杜本皆作多張衡西京賦云炙炮夥清酤多皇恩溥洪德施施與多爲韵此類衆矣故以多爲適也

佗 廣韵云俗作他今通用愚按與它同史記高帝紀於是沛公乃夜引兵從他道還他道別道也又諸餘之辭也儀禮聘禮遭夫人世子之喪君不受使大夫受于廟其他如遭君喪鄭注云其他謂禮

所降史記文帝紀佗不在令中者皆以此令比率從事漢書文紀佗作它韓安國傳所推舉皆天下廉士賢于已者於梁舉壺遂臧固至它皆天下名士師古云於梁舉二人至于他餘所舉亦皆名士也

俄 公羊傳桓公二年至乎地之與人則不然俄而可以爲其有矣何休云俄者謂須臾之間北周書庾信傳進爵義城縣侯俄拜洛州刺史俄猶尋也又通作蛾漢書班婕妤傳始爲少使蛾而大幸如淳云蛾無幾之頃也師古云蛾與俄通

那 廣韵云奴何切爾雅云於也郭注云左傳棄甲則那那猶今人云那那也杜注云那猶何也顧氏日知錄云直言之曰那長言之曰奈何一也愚按杜注云何也者省文也又徐禎卿談藝錄云樂府中有妃呼豨伊阿那諸語本自無義但補樂中之音耳又世說那得初不見君教兒那得何得也又盧祖臯倦尋芳詞那更柳花迎面此那字猶云如何有無奈之義

麼 語餘聲也王仲初詩衆中遺却金釵子拾得從他要贖麼又方言以何事爲麼事釋氏傳燈錄常

云作麼生言作何事也又去聲義同

和 猶云并也王仲初詩和雪翻管一夜行

邪 廣韵云與耶同顏氏家訓云邪者未定之辭左
傳不知天之棄魯邪抑魯君有罪於鬼神邪莊子
天邪地邪漢書是邪非邪之類是也而北人卽呼
爲也字亦爲誤矣難者曰繫辭云乾坤其易之門
邪此又爲未定之辭乎答曰何爲不爾愚按凡邪
乎與哉竝有兩義一疑而未定之辭一詠歎之辭
如乾坤其易之門邪是詠歎辭也如管子如此而
近有德而遠有色則四封之內視其君其猶父母

邪韓昌黎施先生墓銘縣曰萬年原曰神禾高四尺者先生墓邪竝是詠歎之辭呼邪爲也固非而單訓未定其義亦狹又漢書元許后傳內邪若不私取小府將安所仰乎師古云邪語辭也愚按上二邪字其聲長此邪字其聲短乃聲之頓挫與詠歎不同又荀子榮辱篇今以夫先王之道仁義之統以相羣居以相持養以相藩飾以相安固邪以夫桀紂之道是其爲相縣也幾直夫芻豢之縣糟糠爾哉此邪字焉辭也又荀子勸學篇爲善不積邪安有不聞者乎此邪字耳辭也言爲善特不積

耳安有積而不聞者乎如漢書翟義傳欲令都尉
自送則如勿收邪諸葛武侯正議二三子各以耆
艾之齒永僞指而進書有若崇竦稱莽之功亦將
偏於元禍苟免者邪二邪字竝耳辭也

些 少許之辭史邦卿夜行船詞過收燈有些寒在
娑 世說下官家故有兩娑千萬按娑語聲猶言兩
箇千萬也或云娑音箋一云箋去聲如楚詞些字
讀

加 增多之辭也孟子寡人之民不加多漢書文帝
紀朕親率天下農十年于今而野不加辟鮑昭寄

妹書吾自發寒雨全行日少加秋潦沿汗山溪猥至

嗟

釋名云嗟佐也言不足以盡意故發此聲以自

佐也漢書匈奴傳嗟土室之人顧無喋喋佔佔冠固何當師古云嗟者歎慙之言也愚按猶云噫也又詩周頌嗟嗟臣工宋傳云嗟嗟重歎以深勅之也又詩國風猗嗟昌兮毛傳云猗嗟歎辭正義云猗是心內不平嗟是口之啼咀皆傷歎之聲故爲歎辭又戰國策威王勃然怒曰叱嗟而母婢也叱嗟者叱而且嗟一聲而兼二義一言不足以形似

故云叱嗟也。

遐 詩小雅心乎愛矣遐不謂矣禮記表記引詩作
瑕不謂矣鄭注云瑕之言何也正義云胡何也愚
按遐得爲胡者遐何音相近何胡音相近也又詩
邶風泉水遄臻於衛不瑕有害朱傳云瑕何也言
如是則其至衛疾矣然豈不害於義理乎又二子
乘舟願言思子不瑕有害朱傳云不瑕疑辭也愚
按毛傳訓遐爲遠與詩義全無干涉朱傳義長也
不瑕有害猶云得無有害蓋泉水以衛女義不得
歸故疑歸而有害乘舟則國人旣傷二子見害乃

故爲唯恐見害之言以哀之也不暇得爲疑詞者
不有無義瑕有何義何寧義通得無無寧皆疑辭
也又通作霞後漢書劉昭序爲山霞高不終踰乎
一壠

良信也果也誠也漢書五行志鄉邑桓公星遂至
地中國其良絕矣師古云良猶信也後漢書獨行
傳雖事非通則良其風軌有足懷者景丹傳世祖
引見丹等笑曰邯鄲將帥數言我發漁陽上谷兵
吾聊應言然何意二郡良爲吾來魏文帝與吳質
書古人思秉燭夜遊良有以也其義竝同又甚也

漢書馮唐傳上既聞廉頗李牧爲人良說張平子
東京賦良久乃言曰鄙哉予乎習非而遂迷也良
久猶云甚久也

方 當也漢書賈誼傳方今之執何以異此後漢書
方術傳東海君有罪吾前繫于葛陂今方出之使
作雨也魏志太祖紀注會諸將曰孤已得冀州諸
君知之乎皆曰不知公曰諸君方見不久也又詩
國風方何爲期朱傳云方將也將以何時爲歸期
也庾子山哀江南賦小人則將及水火君子則方
成猿鶴方亦將也將亦方也古人文別而義同如

此類甚多非有兩義又國風方將萬舞鄭箋云將且也愚按方將重言也又杜元凱左傳序聖人包周身之防既作之後方復隱諱以辟患非所聞也此方字始也纔也顏延年秋胡詩良時爲此別日月方向除李善注引廣雅云方始也愚按始初也又書洪範既富方穀此方字乃辭也猶云然後又水經注河伯以禮穆王視圖方乃導以西邁矣方乃重言也又史記陳涉世家趙方西憂秦南憂楚其力不能禁我外戚世家是時項羽方與漢王相距滎陽庾子山哀江南賦天子方刪詩書定禮樂

此方字正也適也又孟子周公方且廝之此方字
且也尚也方且重言也言荆舒尚且爲周公所廝
而陳相乃欲學許行也世說王劉與林公共看何
驃騎驃騎看文書不顧之主謂何曰我今故與林
公來相看望卿擺撥常務應對予言那得方低頭
看此邪此方字亦是且尚之辭言故來相看何得
尙低頭看此不顧也又張平子南都賦方今天地
之睢刺帝亂其政豺虎肆虐真人革命之秋也李
善云漢書音義云方向也謂高祖之時倉頡篇云
今時辭也謂光武愚按方今猶云向時不必以向

屬高以今屬光方今得爲向時者反訓也爾雅訓肆爲故今訓徂爲在存郭注云肆旣爲故又爲今今亦爲故故亦爲今此義相反而兼通又云以徂爲存猶以亂爲治以襲爲葬以故爲今此皆詁訓義有反覆旁通美惡不嫌同名也

當 應也合也北史源思禮傳爲政當舉大綱又漢書萬石君傳內史貴人入問里里中長老皆走匿而內史坐車中自如固當師古云此深責之也內史貴人正固當耳愚按固當者反言其不當也如管子仲父不當盡語我昔者有道之君乎漢書張

釋之傳吏不當如此邪薛廣德傳曉人不當如是邪不當者反言當也又後漢書劉盆子傳謂盆子曰自知當死不對曰罪當應死當應重言也又王右軍帖虞生何當來李義山詩何當共剪西牕燭何當言何時當如此也又詩關雎正義云欲以采得爲次則鷄鳴之作遠在緇衣之前鄭國之風必處檜詩之後何當後作先采先作後采乎魏志朱建平傳何當此子竟早隕滅戲言遂驗乎此何當猶云何乃當字在此乃語助不爲義者也如蔡中郎幽冀刺史久闕疏愚以爲三互之禁禁之薄者

以陛下威靈申明禁令在任之人豈不戒懼而當
坐設三互自生晉閔邪魏志溫恢傳得無當得蔣
濟爲治中邪此當字竝是乃辭語之助也又魏志
鍾會傳文王笑曰我寧當復不知此邪當復竝語
助省此二字讀則義明也又魏志陳羣傳注案晉
太康三年地記晉戶有三百七十七萬吳蜀戶不
能居半以此言之魏雖始承喪亂方晉亦當無乃
太殊此當字亦是語助猶云將也又易繫辭易之
興也其當殷之末世周之盛德邪當文王與紂之
事邪此當字正適之辭言正値之也又史記項羽

紀當是時楚兵剋諸侯此當字猶云方也史記叙
正事訖欲更叙同時事多云當是時當此之時也
又魏志華佗傳佗久遠家思歸因曰當得家書方
欲暫還耳此當字猶云適纔也王右軍帖適得書
與此義同又吳志陸凱傳乃被召當下逕還赴都
當下猶云卽時也又史記酷吏傳前主所是著爲
律後主所是疏爲令當時爲是何古之法乎當時
與當下義近舉見在而言言在此一時卽爲是耳
李義山詩此情可待成追憶只是當時已惘然言
當下已可惘然不待追憶之也又魏志管輅傳景

春與輅別戒以二事言卿性樂酒量雖溫克然不可保寧當節之寧當猶云寧可羅鄴蔣子文傳當行十里忽覺如有一黑衣人爲之導其人隨之當復二十里見大樹此當字義與可近豫爲約計之故云當也

將 揚子雲甘泉賦惟漢十世將郊上玄李善云廣雅云將欲也愚按如論語吾將問之言將欲問之也史記禮書故儒者將使人兩得之者也墨者將使人兩失之者也楚辭卜居君將何以教我諸將字竝是將欲之辭廣韵云將行也行亦欲辭故訓

將爲行行得爲欲者凡有所行皆是欲如此也方
欲如此而猶未如此曰將故將又通爲幾及之辭
如孟子今滕絕長補短將五十里也此言不及五
十里也今人乍見孺子將入于井此言幾入于井
也後漢書南蠻西南夷傳若乃文約之所沾漸風
聲之所周流幾將日出入處也幾將重言也又左
傳襄公二十一年猶將十世宥之以勸能者吳志
孫堅傳卓逆天無道蕩覆王室今不夷汝三族縣
示四海則吾死不瞑目豈將與乃和親邪孫皓傳
注正使有之將有何失諸將字猶云當也又廣韻

云將辭也。愚按將之爲辭者，謂是語助，不爲義也。然亦有分別。如詩周頌將予就之，此將字發語聲。猶云抑也。楚辭卜居吾寧悃悃款款，樸以忠乎？將送往勞來斯無窮乎？此將字亦是抑辭。然是轉語與上有別。又如左傳襄公三年寡君將君是望，敢不稽首。將君是望，猶云維君是望。管子非子定社稷，其將誰也？其將誰，猶云其伊誰也。漢書儒林傳於是孔甲爲涉博士。師古云：孔光傳鮒爲陳涉博士。死陳下。今此云孔甲將名鮒而字甲也。後漢書馬援傳：季孟嘗折愧子陽而不受其爵。今更其陸

陸欲往附之將難爲顏乎廬山諸道人游石門詩
序此雖廬山之一隅實斯地之奇觀皆傳之於舊
俗而未觀者衆將山懸瀨峻險人獸迹絕逕回阜
曲路阻行難故罕經焉此將字猶云殆也以上七
條竝是語助但因文設辭義各有協耳又左傳襄
公二十五年烏乎詩所謂我躬不閱皇恤我後者
甯子可謂不恤其後矣將可乎哉昭公三年梁丙
曰甚矣哉子之爲此來也子太叔曰將得已乎此
將字猶豈也將得爲豈者將寧也寧豈也轉相訓
如孟子亦將有以利吾國乎此將字行也當也抑

也寧也豈也其義竝通又孟子今滕壤地褊小將
爲君子焉將爲野人焉朱注云言滕地雖小亦必
有爲君子而仕者亦必有爲野人而耕者愚按此
將字猶云或也且計度之而未有一定故訓之爲
亦必有必有則已定也亦必有則未定也又顏氏
家訓命取將來乃小豆也李義山詩收將鳳紙寫
相思此將字今方言助句多用之猶云得也又庾
子山春賦肩將柳而爭綠面共桃而競紅史通雜
述篇子之將史本爲二說此將字猶與也及也又
韋應物詩無將別來近顏髻已蹉跎又云無將一

會易歲月坐推遷無將猶云莫以又程伯淳詩將
謂偷閒學少年邵堯夫云我將謂取卻幽州也將
謂疑辭猶今云只道是也又周密謁金門詞屈指
一春將次盡將次幾欲之辭凡云次者當前舍止
之處言行且及之也將欲及之而猶未及之故云
將次又詩國風將子無怒毛傳云將願也鄭箋云
請也又國風將仲子兮小雅將伯助予毛傳竝云
將請也朱傳云將千羊切愚按此將字亦恐是發
語辭如伊維之類當讀如本字

常 猶時時也漢書高帝紀常從王媼武負貫酒又

高帝紀常有大量此言素常有大量也又高帝紀
高祖常繇咸陽此常字與嘗通猶云曾也又漢書
趙廣漢傳亂吾治者常二輔也此常字猶云大率
又宣帝紀尤樂杜鄴之間率常在下杜師古云率
者總計之辭愚按此言杜鄴帝所最樂而大率又
常在下杜也此率字猶云往往則率亦常也如于
定國傳率常丞相議可韓退之柳子厚墓誌率常
屈其座人竝是常常之辭豈可訓爲總計邪又水
經注河水南逕北屈縣故城西十里有風山上有
穴如輪風氣蕭瑟習常不止習常卽率常習非覺

爲之故亦得爲常也又杜子美詩酒債尋常行處
有十尺曰尋倍尋曰常今借作平常之辭尋常得
爲平常者說文云五度分寸尺丈引也十尺曰丈
則常乃二丈也此皆五度最始之數故得借爲平
常耳

長 廣韵云常也李義山詩君王長在集靈臺

嘗 廣韵云曾也試也愚按如孟子孔子嘗爲委吏
矣此嘗字曾也莊子齊物論雖然請嘗言之人間
世雖然若必有以也嘗以語我來此嘗字試也又
漢書平帝紀其歷職更事有名之士則以爲難保

師古云難保者言已嘗有罪過不可保也賈誼傳夫嘗已在貴寵之位天子改容而禮貌之矣已既也既會也嘗已已嘗竝重言也又論語自行束脩以上吾未嘗無誨焉未嘗猶未始也又史記陸賈傳每奏一篇高帝未嘗不稱善未嘗不猶云未有不善無一不稱善也若云未嘗不稱善未始不稱善其義似爲少遠未嘗無誨焉其辭婉故可訓作未曾未始也又漢書高惠高后文功臣表自古帝王之興曷嘗不建輔弼之臣所與共成天功者乎曷嘗猶云幾曾言帝王之興幾曾有不建立輔弼

之臣而與之成天功者乎以言必無之也又左傳
昭公六年吾君賄左右諂諛作大事不以信未嘗
可也此嘗字語助未嘗可卽未可也

相 廣韵云共也詩小雅交相爲瘡交相者彼此更
共之也孟子相與輔相之相與者比合之辭也又
漢書朱雲傳小生乃欲相吏邪相吏猶云見吏言
欲官我也又白香山詩爲問長安月如何不相離
自注云相入聲

強 多餘之辭也古木蘭詩賜物百千強杜子美詩
四松初栽時大抵三尺強韓退之詩失勢一落千

丈強蔣之翹云算家以有餘爲強又論語君召使
擯正義云案諸侯自相爲賓之禮凡賓主各有副
賓副曰介主副曰擯及行人若諸侯自行則介各
從其命數至主國大門外主人及擯出門相接若
主君是公則擯者五人侯伯則擯者四人子男則
擯者二人所以不隨命數者謙也故竝用強半之
數也強半猶云多半

剛 陸魯望詩不知謝客離腸醒臨水剛添萬恨來
皮襲美詩終然合委頓剛亦慕寥廓按方言僅如
此曰剛適如此亦曰剛皮詩則僅辭也陸詩則適

辭也

羗 楚辭王注云羗猶乃也廣韵云發語端也又通
作慶漢書叙傳恐罔蝸之責影兮慶未得其云已
師古云慶發語辭讀與羗同又揚子雲甘泉賦直
嶢嶢以造天兮厥高慶而不可序彊度此慶字在
句中乃語聲也

更 漢書萬石君傳九卿更進用事師古云更互也
張騫傳外國使更來更去師古云遞互來去也

行 且也史記南越傳漢興兵誅郢亦行以驚動南
越魏文帝與吳質書間者歷覽諸子之文對之技

淚旣痛逝者行自念也又詩國風行與子還分朱
傳云行將也魏文帝與吳質書別來行復四年嵇
康絕交書一行作吏此事便廢水經注呂望行年
五十賣食棘津陶淵明詩吾生行歸休諸行字竝
將辭也或云行年者言年歲流行耳豈得爲將年
邪應之曰行年之云今推祿命者有是言耳古未
之有也如一行作吏訓作一去作吏率是不多考
古辭強爲臆解耳行年猶云年將倒文也如漢書
韓安國傳且高帝身被堅執銳蒙霧露沐霜雪行
幾十年行幾猶云將近高帝定天下凡七年故云

行幾十年此豈可云年歲流行乎其不然矣又魏志華佗傳若當針亦不過一兩處下針言當引某許若至語人病者言已到應便拔針病亦行差此行字猶漸也行旣得爲將故得轉爲漸也

誠 廣韵云審也信也愚按果也實也苟也孟子是誠何心哉此誠字果也實也魏文帝與吳質書每念昔日南皮之游誠不可忘此誠字信也實也史記秦紀夷吾謂曰誠得立請割晉之河西八城與秦吕后紀王誠以一郡上太后爲公主湯沐邑太后必喜此誠字審也苟也蓋辭之未定漢書賈誼

傳一寸之地一人之衆天子無所利焉誠以定治而已此誠字亦當訓苟然有聊且之意與上殊別猶云但以定治而已也誠得爲苟者論語苟志於仁矣朱注云苟誠也苟得爲誠故誠亦得爲苟誠與苟義相違而相通者反訓也又後漢書郭林宗傳賈子厚誠實凶德然洗心向善仲尼不逆互鄉故吾許其進也誠實重言也

羸 餘也杜牧之詩十年一覺揚州夢羸得青樓薄倖名羸得猶今云剩得也

平 李義山詩平時避暑拂虹霓平常也平時常時

也

情 張旭春草詩春草青青萬里餘邊城落日動寒
壚情知海上三年別不寄雲中一鴈書會聲臨江
仙詞情知春去後管得落花無情知猶云明知也
生 語助也李太白詩借問別來太瘦生杜子美詩
生憎柳絮白於綿

爭 俗作怎方言如何也李義山詩君懷一匹胡威
絹爭拭酬恩淚得乾姜夔長亭怨慢詞韋郎去也
怎恁得玉環分付

成 語助也庾子山鏡賦真成箇鏡特相宜韋夷中

詩地底真成有劫灰真成猶云真箇箇鏡之箇猶云此也又李義山詩烏言成牒訴多是恨彤幘成牒之成猶今云成千成萬之成成牒而訴者訴之多也又高觀國鳳棲梧詞不成日日春寒去不成猶今云難道宋人方言也

并皆也書大誥朕卜并吉又兼及之辭史記五帝紀余并論次擇其言尤雅者又去聲與併同

寧說文云願辭也書大禹謨與其殺不辜寧失不經論語禮與其奢也寧儉隋書酷吏傳寧飲三升酢不見崔弘度寧茹三升艾不逢屈突蓋又詩國

風寧不我顧鄭箋云寧猶曾也後漢書儒林傳今日之會寧於卿有光榮乎魏志胡質傳太祖問曰胡通達長者也寧有子孫不劉廙傳孺子孺子黃中通理寧自知不諸寧字竝訓曾也又左傳成公二年夫齊甥舅之國也而太師之後也寧不亦淫從其欲以怒叔父抑豈不可諫誨此寧字猶將也凡以將字發句多是辭之不定寧不亦者猶云將無也如後漢書傳俊傳今日罷倦甚卿寧憊邪此言將無憊也吳志大帝傳卿好于衆中面諫或失禮敬寧畏龍鱗乎此言君猶龍鱗犯君之顏如撓

龍鱗將不畏乎。但云寧者省文也。又左傳襄公二十九年。且先君而有知也。母寧夫人而焉用老臣。杜注云。言先君母寧。怪夫人之所爲無用責我。愚按。凡言母寧。有數義。此云母寧夫人者。言母亦將怪夫人之所爲也。如論語無寧死於二三子之手乎。左傳隱公十一年。無寧茲許公復奉其社稷。襄公二十四年。母寧使人謂子子實生我。而謂子浚我以生乎。此寧字亦是願辭。與與其相對。然與其如此寧如此。是決辭。此則加無字領之。便是願辭中不定之義。與何如相近也。杜注云。無寧寧也。去

無訓寧其義不備又左傳襄公三十一年賓至如
歸無寧苗害昭公元年不寧唯是二十二年楚遠
越使告於宋曰寡君聞君有不令之臣爲君憂無
寧以爲宗羞寡君請受而戮之諸此寧字竝語助
不爲義者也又吳志太史慈傳沅卿則州人昔又
從事寧能往視其兒子竝宣孤意於其部曲此寧
字猶云定也言決定能如此也寧有安定之義故
得爲定也又唐書劉吳韋蔣沈柳傳贊又舊史之
文猥醜不綱淺則入俚簡則反漏寧當時儒者有
所諱而不得聘邪此寧字猶豈也又吳志呂蒙傳

如卿二人意性朗悟學必得之寧當不爲乎韓退之送張道士詩天空日月高下照理不遺或是章奏繁裁擇未及時寧當不埃報歸袖風披披寧當猶云豈可又晉書王衍傳何物老嫗生寧馨兒此寧字本作去聲與恁同俗云如此也劉夢得詩云爲送中華學道者幾人雄猛得寧馨則寧字又可作平聲矣馨語餘聲世說冷如鬼手馨正自爾馨如馨地寧可鬪戰求勝竝語之餘不爲義也又陸暢雪詩天公寧底巧剪水作氷花寧底卽寧馨爾馨如馨也

烝。詩國風蝓蝓者蝓烝在桑野朱傳云烝發語辭
小雅南有嘉魚烝然罩罩朱傳云烝然發語聲也
應廣韵云當也周語叔父實應且憎以非余一人
世說陛下不應憂嶠而應憂戎杜子美詩蓬萊足
雲氣應合總從龍合亦應也應合重言也

仍廣韵云因也頻也論語仍舊貫朱注云仍因也
愚按此言相因而不改也後漢書馮緄傳引詩敷
敦淮漬仍執醜虜注云仍因也愚按此仍字因也
爰也吳志太史慈傳注策拊掌大笑仍有兼并之
志矣呂蒙傳既而張遼至夾石聞城已拔仍退此

仍字因也。于是也。凡云爰于是者，皆相因而及之辭也。又漢書武帝紀：「今大將軍仍復克獲師。」古云：「仍頻也。」愚按：頻數也比也。周語：「晉仍無道而鮮冑。」韋注云：「晉厲公數行無道也。」孫黎北里志：「序鼓扇輕浮，仍歲滋甚，仍歲猶比歲也。」

登 公羊傳：「隱公五年，公曷爲遠而觀魚登來之也？」何休云：「登，讀言得得來之者，齊人語也。齊人名求得爲得來，作登來者，其言大而急，由口授也。愚按：今山東人呼得字爲德，歸切。與登字音近，故以得一來爲登來也。又魏志管輅傳：「輅以爲注易之急急。」

于水火水火之難登時之驗登時猶卽時也吳志
鍾離牧傳注牧遣使慰譬登皆首服登卽登時省
文也

曾 孟子爾何曾比予於是趙注云何曾猶何乃也
朱注云曾之言則也愚按曾之言則者蓋本論語
曾謂泰山正義之說以則字亦有乃義也然訓則
不若訓乃爲愜如詩大雅曾是彊禦曾是掊克曾
是在位曾是在服論語曾是以爲孝乎諸曾字竝
合訓乃也又論語曾謂泰山之曾訓作寧豈亦通
廣韵訓豈爲曾則曾亦可訓爲豈矣又杜子美詩

曾爲掾吏趨三輔此曾字猶云嘗也郭象莊子序
夫心無爲則隨感而應應隨其時言唯謹爾故與
化爲體流萬代而冥物豈曾設對獨邁而游談乎
方外哉豈曾猶云何嘗魏志王修傳注讀詩至哀
哀父母生我勞瘁未曾不反覆流涕泣下沾襟未
曾不猶云未有不

能 左傳僖公九年荀叔曰吾與先君言矣不可以
貳能欲復言而愛身乎雖無益也將焉辟之且人
之欲善誰不如我我欲無貳而能謂人已乎能得
也凡言能乎者猶云豈可得乎省文也漢書賈誼

傳夫習與正人居之不能毋正猶生長於齊不能
不齊言也習與不正人居之不能毋不正猶生長
於楚之地不能不楚言也不能不猶云不得不決
辭也又左傳昭公二十六年周其有髡王亦克能
修其職顧氏曰知錄云克卽能也後漢書竇融傳
豈其德薄者所能克堪克能能克竝重言也又論
語法語之言能無從乎異語之言能無說乎能無
猶言寧無能得爲寧者寧能音近也或謂能無從
乎當如荀叔能謂人已乎之義是不能不然然則
能無說乎亦可云不得不然邪其不然矣李義山

詩固有樓堪倚能無酒可傾固有能無竝用論語
足知能無非不得不然之義也又岑嘉州詩別君
能幾日李義山詩未知歌舞能多少黃昇鵲橋仙
詞夜來能有幾多寒此能字亦是寧辭凡云能幾
何猶言寧有幾何能得幾何也又羅昭諫詩我未
成名君未嫁可能俱是不如人可能猶云可堪可
耐能耐古通禮記禮運故聖人耐以天下爲一家
以中國爲一人者非意之也鄭注云耐古能字也
又許用晦詩西去磻谿猶萬里可能垂白待文王
此言磻谿旣已迢遠如何能以垂白之年待文王

之求乎義與可堪相近又李義山詩堪歎故君成
杜宇可能先主是真龍此可能乃不定之辭猶云
未必能也言蜀險雖足倚仗而天命不可假易不
惟故君已成杜宇卽恐先主亦非真龍故結云將
來爲報奸雄輩莫向金牛訪舊蹤也又韓退之詩
杏花兩株能白紅皮襲美詩檜身渾箇矮石面得
能顛唐子西詩桃花能紅李能白此能字與恁同
亦可作去聲方言箇樣也得能卽箇樣吳人語也
恒常也左傳文公八年楚國之粦恒在少者又蔡
中郎陳政要七事恒思皇后祖載之時東郡有盜

人妻者亾在孝中本縣追捕乃伏其辜此恒字猶
曾也嘗也恒旣訓常而嘗與常通轉相訓也

勝 漢書景帝紀朕旣不敏弗能勝識師古云勝識
盡知之愚按勝訓盡者勝是負之對謂優過之也
識優故盡知之如史記陳涉世家當此之時楚兵
數千人爲聚者不可勝數此言爲聚者多亦有優
過之意故不可悉數也三王世家臣竊不勝犬馬
之心不勝猶云無任謙言犬馬愛主之心無有窮
盡亦優過之意也勝本訓堪也當也力優乃能任
負而不匱絀故勝與任通也

尤益甚之辭也史記五帝紀余并論次擇其言尤雅者故著爲本紀書首漢書卜式傳是時富豪皆爭匿財唯式尤欲助費世說秋冬之際尤難爲懷猶廣韵云與猷同爾雅云猷肯可也郭注云詩曰猷來無棄肯今通言疏云皆肯可也詩曰猷來無棄者魏風陟岵文也肯今通言者邶風終風云惠然肯來是也愚按猷訓爲肯者猷尙也尙庶幾也猷有庶幾之義故得爲肯也凡云肯者唯恐其不肯故肯爲庶幾也如書盤庚汝猷黜乃心之猷亦當訓作肯舊注訓作謀猷之猷恐非是左傳昭公

三年張趯有知其猶在君子之後乎顧氏補正云
言庶幾可以爲君子也蓋人臣雖有諱國之禮然
或憂其將亂而私語之於友不害其爲忠此叔向
晏子之言所以不譏於君子也愚按傳謂張趯先
知晉將失諸侯庶幾不愧識微之君子故云在君
子之後杜注以爲譏其無隱諱是以猶爲不滿之
辭也恐非如柳子厚捕蛇者說孔子曰苛政猛於
虎也吾嘗疑乎是今以蔣氏觀之猶信此言庶幾
因蔣氏之事而信苛政猛于虎之言也或問魏風
陟岵云上慎旃哉猶來無止上與尙同庶幾辭也

上已爲庶幾矣何有猶來又爲庶幾曰茲所謂重
言也如阮嗣宗詩多言焉所告繫辭將訴誰沈休
文云重言之猶云懷哉懷哉古人如此類者不少
也又爾雅云猷若也郭注云詩曰實命不猷疏云
若如也論語文莫吾猶人也朱注云言不能過人
而尙可以及人大學聽訟吾猶人也朱注云猶
人不異於人也愚按如若皆及辭相及故不異也
又爾雅云猷已也書大誥王若曰猷大誥爾多邦
又云已予惟小子若涉淵水孔傳云已發端歎辭
也蔡傳云猷發語辭也猶虞書咨嗟之例愚按爾

雅旣訓猷爲已則猶已義通孔傳旣訓已爲發端
歎辭則蔡傳訓猷爲發語辭者是也猶得爲發語
者猶有如若之義如若亦是語助也已得與猶通
者已字是猶字發聲音之轉也又論語猶之與人
也出納之吝謂之有司孔注云猶之與人謂財物
俱當與人左傳襄公十年子蟜曰諸侯旣有成行
必不戰矣從之將退不從亦退退楚必圍我猶將
退也不如從楚顧氏補正云邵氏云猶將退猶言
同一將退也戰國策燕王與樂閒書柳下惠曰苟
與人之其惡往而不黜乎猶且黜乎寧於故國愚

按猶之猶俗云總是論語謂財賄總之要當與人者雖吝無謂而乃出納之吝是有司也子蟯謂諸侯總是欲退者與其退而終被楚圍不如卽從楚也柳下謂總之見黜於人不如仍在故國蓋通前後而爲計慮之辭也又春秋文公六年閏月不告朔猶朝於廟公羊傳云猶者何可止之辭也愚按猶尙也此云猶朝者是未絕之辭言雖不告朔猶且往朝於廟故傳云可止也又孟子且以文王之德百年而後崩猶未洽於天下此猶字亦尙辭也然與前義不同此言以文王之德百年之久尙且

未洽於天下。何況諸餘也。又戰國策蘇代云。今夫齊王長主也。而自用也。南攻楚。五年。穡積散。西困秦。三年。民憔悴。士罷敝。北與燕戰。覆三軍。獲二將。而又以其餘兵。南面西舉。五千乘之勁。宋而包十。二諸侯。此其君之欲得也。其民力竭也。安猶取哉。注云。言齊不可復攻。取愚按。安猶取者。言尚安所攻取也。又左傳僖公四年。一薰一蕕。十年尚猶有臭。漢書賈誼傳。天子春秋鼎盛。行義未過。德澤有加焉。猶尚如是。顧氏曰。知錄云。尚卽猶也。愚按。尚猶尚竝重言也。又莊子堯以天下讓許由。許由

不受又讓於子州支父子州支父曰以我爲天子
猶之可也雖然我適有幽憂之病方且治之未暇
治天下也猶之可若云或可也猶得爲或者庶幾
之轉也如孟子王庶幾改之此將冀幸其或然與
繫辭顏氏之子其殆庶幾乎義別又廣韵云似也
愚按似也如也孟子猶緣木而求魚也又云周公
之不有天下猶益之於夏伊尹之於殷也此猶字
亦不異之辭然與論語大學猶人之猶有別又禮
記內則子弟猶歸器衣服裘衾車馬則必獻其上
而后敢服用其次也鄭注云猶若也子弟若有功

德以物見饋賜當以善者與宗子愚按此猶字是
假設之辭或問下文云若非所獻則不敢以入於
宗子之門何以異文云若曰若非者又是別異之
辭殊於上文者也又公羊傳襄公二十九年今若
是迨而與季子國季子猶不受也管子能強其兵
而不明於勝敵國之理猶之不勝也又云國猶是
國也民猶是民也桀紂以亂亡湯武以治昌此猶
字仍也與春秋猶朝於廟之猶相近而義別又司
馬相如封禪文夫修德以錫符奉符以行事不爲
進越也故聖王弗替而修禮地所謁款天神勦功

中嶽以章至尊舒盛德發號榮受厚祿以浸黎元
皇皇哉斯事天下之壯觀王者之丕業不可貶也
願陛下全之而後因雜摺紳先生之略術使獲耀
日月之末光絕炎以展采錯事猶兼正列其義祇
飾厥文作春秋一義孟康云猶因也愚按猶有仍
義故得轉爲因也又與山通孟子然而文王猶方
百里起是以難也此言從方百里之地而起故難
也

山 與繇同爾雅云山從自也孟子何山知吾可也
史記三王世家自古至今所由來遠矣漢書文帝

紀今法有誹謗詬言之罪是使衆臣不敢盡情而
上無由聞過失也刑法志今人有過教未施而刑
已加焉或欲改行爲善而道凶繇至諸由字竝訓
從也又史記高帝紀由所殺蛇白帝子殺者赤帝
子故上亦此由字因也又孟子由是則生而有所
不用也由是則可以辟患而有不爲也由是猶云
爰是由得爲爰者由因也因爰也轉相訓又廣韻
云山用也書康誥乃其速由文王作罰孔傳云言
速當用文王所作違教之罰又與猶通孟子王由
足用爲善言尙可以爲善也劉琨答盧諶書譬由

疾疢彌年而欲以一丸銷之譬由卽譬猶猶云譬如也

攸 爾雅云所也易利有攸往書洪範彝倫攸叙漢書五行志引書作彝倫迪叙班孟堅幽通賦栗取弔於適古分王膺慶於所熾師古云適古攸字攸亦所也又詩大雅四方攸同蜀志後主傳遂與京畿攸隔萬里此攸字語助不爲義也

疇 爾雅云孰誰也邢疏云皆謂語辭不爲義也愚按誰何也故邢疏云語辭也漢書司馬相如傳疇逆失而能存言何有逆失而能存也

休 方言莫也李義山詩西來雙燕信休通溫飛卿
詩休向人間覓往還

侯 爾雅云伊維也伊維侯也郭注云詩曰侯誰在
矣互相訓邢疏云皆發語辭轉互相訓邢谷風云
伊余來暨大雅大明云維此文王小雅六月云侯
誰在矣又爾雅云侯乃也鄭樵云侯維也維亦乃
也乃引辭也不絕之義也愚按如周頌侯王侯伯
侯亞侯旅侯疆侯以此侯字在句首發語辭也如
小雅宜侯多藏此侯字在句中語助辭也宜侯猶
云信維也又廣韻云何也漢書司馬相如傳君子

君平侯不邁哉師古云侯何也言君何不行封禪也又史記樂書高祖過沛詩三侯之章今小兒歌之索隱云過沛詩卽大風歌侯語辭也沛詩有三兮故云三侯愚按侯兮義旣同則侯亦得爲語已辭也

尋 旋也隨也辛叔子讓開府表以身誤陛下辱高位傾覆亦尋而至宇文適庾子山集序尋轉尙書度支郎中凡相因而及曰尋猶今云隨卽如何也臨 猶及也謂正當其時也漢書杜欽傳方進素與司直師丹相善臨御史大夫缺使丹奏咸爲姦利

請案驗卒不能有所得而方進果自得御史大夫
世說王大爲吏部郎嘗作選草臨當奏又云公長
民短臨時不知所言張文昌詩行人臨發又開封
王仲初詩臨上馬時齊賜酒劉夢得詩平章宅裏
一闌花臨到開時不在家

今卽辭也漢書汲黯傳君薄淮陽邪吾今召君矣
此言卽召其還也又周語惠王十五年有神降於
莘王問於內史過曰今是何神也此今字猶此也
今是當下之稱故得爲此也卽也

任 廣韵云當也左傳成公三年臣不任受怨君亦

不任受德不任猶云不當也荷之於身謂之任當有任受之義故任得爲當也又吳志諸葛恪傳卒腹痛不任入此任字猶能也又謝朓謝左傳啓伏銘私荷不任下情此不任猶云不勝也義見勝字條下

深 極也甚也世說子猷言語殊不遜深不可容字文迥庾子山集序深爲梁王所賞

堪 廣韵云任也勝也左傳隱公元年國不堪貳又云君將不堪桓公二年民不堪命不堪猶今云當不得也任卽當也優任之故又得爲勝也盧綸詩

舊業已隨征戰盡更堪江上鼓鼙聲此堪字猶云
那堪省文也又李義山詩黃金堪作屋此堪字猶
云可也

兼 廣韵云并也漢書趙廣漢傳亂吾治者常二輔
也誠令廣漢得兼治之直差易耳水經注今濟北
東阿東北四十里有故清亭卽春秋所謂清者也
是濟水通得清之目焉亦水色清深用兼厥稱矣
韓退之詩今日嶺猿兼越鳥

咸 爾雅云僉咸胥皆也書咸有一德俾萬姓咸曰
大哉王言

僉·書舜典僉曰伯禹作司空

凡 說文云最括也愚按大率也一切也詩小雅凡
今之人莫如兄弟孟子故凡同類者舉相似也此
凡字一切之辭也史記吳世家大凡從太伯至壽
夢十九世韓退之伯夷頌今世之所謂士者一凡
人譽之則自以爲有餘一凡人沮之則自以爲不
足大凡一凡竝大率也文史記高帝紀凡吾所以
來爲父老除害非有所侵暴毋恐此凡字猶云總
之蓋安民之意不可勝舉故括言之也漢書萬石
君傳於是景帝曰石君及四子皆二千石人臣尊

寵廼舉集其門凡號奮爲萬石君師古云凡最計也總合其一門計五人爲二千石故號萬石君又廣韵云皆也荀子榮辱篇故與人善言煖於布帛傷人之言深於矛戟故薄薄之地不得履之非地不安也危足無所履者也凡在言也楊注云凡皆也